



Inatsisartunut ilaasortamut
Jens-Frederik Nielsen
Demokraatit

18-10-2024
Sags nr. 2024 - 20218
Akt. id. 24697285

Postboks 260
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

§ 37 naapertorlugu apeqquut nr. 225-2024-mik Qinikkatut Pisortanillu Toqqakkatut suliaqarnermut tunngatillugu akissuteqaat

Asasara Jens-Frederik Nielsen.

Apeqqutitut qujanaq. Apeqqutit ataasiakkaarlugit ataani allaqqinneqarput, akissummik malitseqartillugit.

1. Naalakkersuisut ilisimasaqarnerpat suliffeqarfinni pisortanit pigineqartuni, politikkerit eqeersimaartut pisortatut atorfinnut atorfinnissaannut naallerneqartunit?

Naalakkersuisut pisortat suliffeqarfii ataatsimut isigalugit politikkerinik eqeersimaartunik pisortatut atorfinnut atorfinitsitsinngitsoornermik pisoqarneranik ilisimasaqanngillat. Taamaattoq soorunami peqataasinnaassuseqarnermut malittarisassat equutitineqassapput, tamatumanilu piumasaqaataasinnaavoq, inuk aalajangiinermik imaluunniit suliaasanik, politikkeritut aqutsinikkullu ingerlatsinermut inissisimanerit akornanni soqutigisatigut aaqqiagiinngissuteqarsinnaasunik, peqataasinnaannginneq.

Taamaattoq kommunit aqunneqarnerat pillugu Inatsisartut inatsisaanni § 40, imm. 2 aamma 3 naapertorlugit immikkut ittunik malittarisassaqaarpoq, kommunimi ataatsimiititaliamut ataavartumut imaluunniit aningaasaqarnermut ataatsimiititaliamut ilaasortaanissaannik ataani ingerlatsivimmi pineqartumi pisortani atorfillinnut akisussaasutut aqutsisunut killiliisut. Tamanna isumaqarpoq, kommunimi ingerlatsinermi aqutsisutut atorfillit ataatsimiititaliani taakkunani ilaasortaanissaanngitsut, atorfimminnut politikkeritullu atuuffiisa akornanni soqutigisanik aaqqiagiinngissuteqarsinnaaneq pissutigalugu.

a. Tassunga Naalakkersuisut qanoq isumaqarpat?

Naalakkersuisut suliaasaqarfimmi maannakkut ajornartorsiutaasoqarnissaanik ilisimasaqanngillat, kisianni pisariaqartillugu siunnersuutaasinnaasut pillugit soorunami tusarnaarsinnaallugit.

b. Naalakkersuisut isumaqarpat, naligiissitaanermut aamma assigiinngisitsinnginnermut inatsit unioqqutinneqartoq, suliffeqarsimassappat, allaganngorlugit malittarisassaqaartunik, politikkerit eqeersimaartut pisortatut atorfimmik ingerlatsisinnaanngitsut?

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfimmiit ilanngunneqartoq:



Naalakkersuisoqarfiup naliliiffigaa, suliffeqarfiit politikkerit eqeersimaartut aqutsisutut atorfeqannginnissaat pillugu allakkatigut malittarisassaqaarsimappata, tamanna Naligiissitaaneq Assigiinngisitsinnginnissarluk pillugit Inatsisartut inatsisaannik unioqquitsinerunngitsoq.

Naligiissitaaneq Assigiinngisitsinnginnissarluk pillugit Inatsisartut inatsisaanni § 4 naapertorlugu "politikikkut isiginnittaaseq" tunngavigalugu assigiinngitsitsineq inerteqqutaavoq. Taamaalluni inatsimmik unioqquitsinerussaaq, suliffeqarfik allakkatigut malittarisassaqaarsimappat, politikkerimik eqeersimaartumik partiimit aalajangersimasumiittoq aqutsisutut atorfimmik atorfeqaqqusaanngippat. Kisianni naligiissitaanermik inatsimmik unioqquitsinerunngilaq, politikkerit tamarmik aqutsisutut atorfeqarsinnaatitaanngippata.

- i. **Taamaassimappat tassunga atasumik suliniutit suut Naalakkersuisut aallartinniarpaat?**

Takuuk apeqquut 1.b-mut akissut.

2. Qanoq ililluni inuk, pisortat ingerlataanni pisortatut atorfeqartoq, qinikkatut pisortanillu toqqakkatut sulinngikkallarnermut malittarisassanit illersorneqarsinnaava¹, pineqartoq Inatsisartunut imaluunniit kommunalbesstyrelsimut qinerneqarluni iserpat?

Naalakkersuisut apeqquummi pineqartoq ima paasivaat qinikkatut pisortanillu toqqakkatut malittarisassanut atatillugu inuk tjenestemanditut atorfeqartoq illersugaanera pillugu paasissutissanik kissaateqartoqartoq. Oqaatigisariaqarpoq aqutsisutut atorfinni atorfillit aamma allani atorfillit akornanni immikkoortitsisoqanngimmat.

Apeqquummi Namminersorlutik Oqartussat Qinikkatut Pisortanillu Toqqakkatut suliaqarneq il.il. pillugu nalunaarutaat innersuussutigineqarpoq. Naalakkersuisut tamaatumunnga atatillugu ilisimatitsissutigisinnaavaat, tjenestemanditut atorfillit qinikkatut pisortanillu toqqakkatut suliaqarnerannut atatillugu nalunaarutip aalajangersarmagu.

Nalunaarummi aalajangersarneqarpoq tjenestemandit sulinngiffeqarnissamut kiffaanngissuseqartut, tamannalu piffissap suliffiup allanngortiterneqarneratigut imaluunniit suliffimmik paarlaasseqatigiinnikkut pissaaq. Tamanna ajornarpat tjenestemandip katillugit piffissamik suliffissaanik annertuumik sivitsuinnikkut aatsaat pisinnaappat, qaammatsiutit ukiuanni ataatsimi ullut 60-it tikillugit tjenestemandi sulinngiffeqarsinnaavoq akissarsiaminik ilanngaaffigineqarnani. Sulinngiffeqarneq siviluneruppat tjenestemandip akissarsiai ilanngaaffigineqassapput sulinngiffeqarnerup nalaani ulloq suliffik ataatsimi nal. akunneri sisamat tikillugit qaammammut akissarsiat 1/60-iata ullormilu suliffimmi nal. akunneri sisamat qaangerlugit qaammammut akissarsiat 1/30-iata nalingannik. Taamaattoq qinikkatut pisortanilluunniit toqqakkatut atuunnermi aningaasarsianik ilanngaaf, tjenestemandi allatut naatsorsuiner­mik akuersitillugu, qaammammut aningaasanik qaammammut ajunngitsorsiat ataatsimiinnersiutilluunniit assinganik naleqartumik isu­maginninnermi annertussuseqarsinnaavoq. Aningaasat sinneruttut qaammatip tullianut nuunneqassapput. Ukiup feeriarfissanik katersiffiup iluani aningaasarsianik ilanngaafat ataatsimut ajunngitsorsianit ataatsimiinnersiutinillu piffissami tassani tjenestemandimit pissarsiarineqartunit annerusinnaanngillat.

Tjenestemandi Folketingimi ilaasortaanini pissutigalugu atorfimmini sulinngitsoq atorfimmi tassani akissarsiaqartinneqassanngilaq.

¹ Namminersorlutik Oqartussat Qinikkatut Pisortanillu Toqqakkatut suliaqarneq il. il. pillugu nalunaarutaat



Piffissaq qinikkatut pisortanilluunniit toqqakkatut, Folketingimiluunniit ilaasortatut tjenestemandip sulinngiffeqarfigisaa, aningaasarsianik soraarnerussutisianilluunniit naatsorsuinnermut ilanngunneqassaaq.

3. Naalakkersuisut ilisimasaqarpat, ukiuni kingullerni qulini politikkerinik eqeersimaartunik, atorfinitsinneqarnerminni kingunerlutsitsisunik politikkikkut atuunermik malitsigisaanik?

Naalakkersuisut ukiuni kingullerni qulini politikkerinik eqeersimaartunik, atorfinitsinneqarnerminni kingunerlutsitsisunik politikkikkut atuunermik malitsigisaanik pisoqarsimanersoq pillugu ataatsimut isigisinnaangilaat.

a. Taamaassimappat Naalakkersuisut piumaffigineqarput suliat ataasiakkaarlugit nassuiaqqullugit aqqi isertuullugit.

Attuumassuteqanngilaq.

4. Naalakkersuisut suliamut soqutiginaatilinnik allanik paasissutissiisinnaappat?

Naalakkersuisut ilisimatitsissutigisinnaavaat, Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik 2025-mi kommunalbestyrelsimut ilaasortanut sulinerminni, tassunga ilanngullugu qinikkatut pisortanilliinnuut toqqakkatut, atugassarititaannik misissueqqissaarnissaq pillugu pilersaaruteqarmat.

Inussiarnersumik inuulluaqqusillunga

Jess Svane